



TEKS UCAPAN

YB DATUK SERI DR. NORAINI BINTI AHMAD

TIMBALAN MENTERI PEMBANGUNAN WANITA, KELUARGA DAN MASYARAKAT

PROGRAM

**PROGRAM ADVOKASI KESEJAHTERAAN UNTUK WANITA @KEGANASAN RUMAH
TANGGA (AKU WANITA@KRT) NEGERI TERENGGANU**

LOKASI / TARIKH / MASA

**TERENGGANU EQUESTRIAN RESORT
16 JULAI 2025 (RABU) 10.30 PAGI**

Bismillahirrahmanirrahim

Assalamualaikum Warahmatullahi Wabarakatuh,
Salam Sejahtera dan Salam Malaysia Madani.

(SALUTASI)

LAMPIRAN SALUTASI DISEDIAKAN

(A) **PENDAHULUAN**

1. Alhamdulillah bersyukur kita kepada Allah S.W.T kerana dengan limpah kurnia-Nya dapat kita sama-sama berkumpul hari ini dalam **Program Advokasi Kesejahteraan untuk Wanita@Keganasan Rumah tangga (Aku Wanita@KRT)**.
2. Terlebih dahulu, saya ingin merakamkan **ucapan tahniah kepada Jabatan Pembangunan Wanita (JPW)** selaku penganjur program dan **Pejabat Pembangunan Wanita Negeri Terengganu (PPWN)** selaku tuan rumah.

3. Saya juga ingin merakamkan ucapan ribuan terima kasih kepada tuan/tuan dan puan/puan sekali yang sudi meluangkan masa memberi sokongan kepada program ini. Saya dimaklumkan bahawa hampir **500 orang peserta hadir hari ini dan tepukan gemuruh untuk semua.**

4. Komitmen seperti inilah yang kementerian kami harapkan dalam usaha menyokong **kempen menangani keganasan terhadap wanita** dan kehadiran tuan-tuan dan puan-puan dari pelbagai latar belakang menunjukkan satu petanda jelas bahawa kesedaran dan keprihatinan masyarakat terhadap isu keganasan rumah tangga semakin meningkat.

(B) **KES KEGANASAN RUMAH TANGGA**

Puan-puan, tuan-tuan, hadirin yang saya kasihi sekalian.

5. Keganasan rumah tangga bukan sekadar isu peribadi atau hal rumah tangga semata-mata. Ia adalah **satu kesalahan jenayah dan pelanggaran hak asasi manusia** yang menjadi **ancaman senyap** terhadap kesejahteraan institusi keluarga.

6. Realitinya, penderaan dan keganasan dalam rumah tangga masih berleluasa dan ia berlaku dalam pelbagai bentuk, bukan sahaja secara fizikal, tetapi juga secara emosi, seksual, ekonomi dan psikologi yang boleh memberi kesan jangka panjang terhadap mangsa, terutamanya wanita dan kanak-kanak.
7. Kebanyakan kes keganasan rumah tangga dilakukan oleh orang yang dikenali wanita tersebut seperti suami, bekas suami atau teman lelaki dan yang lebih memburukkan keadaan apabila kes tersebut tidak dilaporkan.

8. Statistik yang dikeluarkan oleh **Polis Diraja Malaysia (PDRM)** menunjukkan bahawa pada **tahun 2024 sahaja, sebanyak 7,116 kes keganasan rumah tangga telah dilaporkan** dan sehingga **April 2025**, sebanyak **2,467 kes** telah direkodkan.
9. Bagi **negeri Terengganu**, **kes keganasan rumah tangga bagi tahun 2024 adalah sebanyak 379** dan merupakan yang tertinggi di Malaysia jika dilihat mengikut nisbah populasi penduduk di negeri ini, iaitu pada kadar **0.03**.

10. Bagi tahun 2025, **sehingga April 2025** kes yang dilaporkan di negeri Terengganu adalah sebanyak **104 kes**, berbanding **130 kes** dalam tempoh yang sama pada tahun 2024. Walaupun berlaku penurunan pelaporan kes, namun angka tersebut tetap perlu diberi perhatian.
11. Kemungkinan besar masih ramai mangsa diluar sana yang tidak berani tampil ke hadapan untuk mendapatkan bantuan disebabkan perasaan takut, malu, atau tidak tahu cara mendapatkan bantuan.

12. Terdapat juga kes di mana mangsa tidak sedar bahawa mereka adalah mangsa keganasan rumah tangga. Ini berlaku mungkin disebabkan pemikiran mangsa telah dimanipulasi sehingga mangsa merasa bingung dan meragui ingatan dan persepsi mereka sendiri.
13. Pelaku mungkin menyalahkan mangsa atas sesuatu yang tidak berlaku atau memutarbelitkan fakta untuk membuat mangsa merasa tidak berdaya dan menyebabkan trauma yang mendalam. Situasi ini memberi kesan jangka masa panjang kepada mental serta kesejahteraan emosi mangsa.

(C) PROGRAM ADVOKASI KESEJAHTERAAN UNTUK
WANITA@KEGANASAN RUMAH TANGGA (AKU
WANITA@KRT)

Puan-puan, tuan-tuan, hadirin yang saya kasihi sekalian.

14. Sebagai sebuah Kementerian yang bertanggungjawab terhadap pembangunan wanita, keluarga dan masyarakat, **KPWKM sentiasa komited dalam memperkukuhkan dasar, undang-undang serta mekanisma** dalam menyampaikan maklumat dan sokongan kepada komuniti terutamanya mangsa keganasan rumah tangga.

15. Justeru, usaha untuk meningkatkan kesedaran, memberi keyakinan dan keberanian kepada wanita untuk bersuara, serta menyediakan ruang sokongan dan pemulihan yang selamat merupakan komponen penting dalam menangani isu ini secara menyeluruh.
16. Justeru, **Program Advokasi Kesejahteraan untuk Wanita@Keganasan Rumah Tangga** atau **Aku Wanita@KRT** dirangka sebagai platform strategik bagi mendekati masyarakat dalam menangani masalah KRT.

17. Melalui program ini, isu-isu berkaitan keganasan rumah tangga akan dibincangkan secara mendalam bersama pakar dalam bidang tersebut dan juga pemandiri iaitu mangsa yang telah berjaya keluar dari masalah KRT untuk mereka berkongsi kisah kebangkitan hidup mereka.
18. Selain itu, sesi intervensi psikologi yang dinamakan “**K-Chat**” juga telah diperkenalkan menerusi program ini. Sesi ini merupakan intervensi berkumpulan antara pemandiri bersama kaunselor dan fasilitator terlatih untuk membantu peserta memahami dan menangani isu yang melanda diri akibat keganasan.

19. Pada 17 Mei 2025 yang lalu, JPW telah melaksanakan forum keganasan rumahtangga bertajuk “**Ayuh Berani Lapor**” di Dewan Masyarakat Papar, Sabah, yang dihadiri seramai 700 orang peserta dan seramai 12 orang fasilitator telah menghadiri sesi K-Chat.
20. Selain daripada itu, KPWKM menerusi JPW turut giat menjalankan pelbagai program advokasi seperti program Meningkatkan Daya Tahan dan Psikologi Wanita (Matahari) dan Program Literasi Perundangan dan Hak Wanita (IRIS) serta Skuad Waja.

(D) PENUTUP

21. Ingin saya tegaskan di sini bahawa **komitmen KPWKM untuk menangani keganasan rumah tangga adalah jelas dan tidak berbelah bahagi**. Kita akan terus melaksanakan program berbentuk pencegahan, perlindungan dan pemulihan, agar tiada siapa pun tercicir daripada sistem sokongan yang wujud.

22. Adalah menjadi harapan saya supaya **Program Advokasi Kesejahteraan untuk Wanita@Keganasan Rumah Tangga** atau **Aku Wanita@KRT** ini memberi manfaat kepada masyarakat khususnya dari negeri Terengganu dalam meningkatkan kesedaran tentang isu keganasan rumah tangga.
23. Akhir kata, marilah kita bersama-sama mendokong usaha menangani keganasan rumah tangga dan melindungi wanita daripada segala bentuk keganasan dan penganiayaan.

24. Kami di kementerian Pembangunan Wanita, Keluarga dan Masyarakat akan terus berusaha untuk melaksanakan pelbagai inisiatif bagi menangani isu ini dan seterusnya memartabatkan agenda pemerkasaan wanita negara.

25. Akhir kalam, dengan lafaz “Bismillahir Rahmanir Rahim”, saya merasmikan **Program Advokasi Kesejahteraan untuk Wanita@Keganasan Rumah Tangga atau Aku Wanita@KRT Negeri Terengganu**

Sekian, Wabillahi taufiq walhidayah

Wassalamualaikum warahmatullahi Wabarakatuh.

YB DATUK SERI DR. NORAINI BINTI AHMAD

Timbalan Menteri Pembangunan Wanita, Keluarga Dan Masyarakat

16 Julai 2025